

四庫全書

集部

欽定四庫全書

太倉稊米集卷十五

宋 周紫芝 撰

詩四十七首

次韻鄭使君白菊

平生鄭康成不種花  
嬋娟但聞書帶草  
羅生滿堂前佳菊  
苦解事殷勤為公  
妍紅油護霜日一  
笑真嫣然秋風轉  
寒枝束素爭回旋  
團欒立芳砌皎若  
璧月圓使君頗  
救手年來出臨邊  
燕衍自折衝賓從  
時招延苦愛白玉

姿臨風嗅芳鮮揚州東閣梅自此復誰憐安得白雲詞

寫入朱絲絃淵明眼獨醒載酒知誰先騷人始精藥精

謂菊語  
在楚詞

世塵聊自蠲幽姿倏已空二士窮益堅人生五

馬貴行樂須何年絕勝杜陵老江花惱成顛才名與富  
貴似公真兩全新詩如脫彈一出萬口傳鋒車行復來  
琬琰殊未鐫且當對香雪燕寢凝沉箋

次韻遠猷旅夕二首

西風滿眼莫登樓回望鄉關去未由晚色不催金絡馬

夜燈空夢玉搔頭梁王行識相如賦楚國方悲宋玉秋  
萬里長途知不晚一杯聊為老人留

久占無何作醉鄉人間萬事只逢場潘郎已老謾華髮  
夢得多情還斷腸政恐新愁無處着不知清夜為誰長  
煩君試草思歸曲付與蛾眉小抑揚

王將軍與李伯時二馬遺張天民

龍眠筆意天與妙尺素幻出雙驂騮一馬不動尾四蹄  
踣鐵邊風秋一馬爭前趨平坡欲下方回頭兩馬交頸

萬里愁龍媒未免羈長秋風繫霧鬣不受囚錦韜坐遣  
鴛鴦羞將軍六郡良家子卷送歸君深有意蹶如厯塊  
一過都肯以鞭韉煩圍奴人間豈有渥洼足不與天驥  
爭長途草黃沙晚天欲黑縱有權奇少人識眼中千里  
不易得時危願爾一努力

須江雨中

須江樓上倚秋風草樹荒涼故壘空吹盡角聲人不見  
畫橋和雨繫艤舫

擇之得鹿割鮮見餉以詩為謝

潘郎尉居巢月止萬錢俸遥憐寒孟郊午食勤夜誦空

庖無雞豚敢設亞父供

南巢有亞父井官吏至者必先祭乃敢從事事見東漢

如

何得伊尼割鮮勤遠送老夫極驚喜兒曹亦嘲諷憫我

太常齋此意君良重飢腸罄一飽狀若蹲鴟凍茅簷坐

局促山禽聽曉哢安得隨少年短衣飛挽鞚燒野得驚

麋即之那忍縱啣啣寒聲微麋麋一矢中聊復從左孟

獵我江南夢

春秋左氏傳曰江南之夢杜預楚之雲夢跨江南北

秋意三首

雨細方淋露雲疎欲護霜老情常落莫秋物半青黃榆

塞方窺月天田馬犯疆防城江上急時節近重陽

八月露下

而雨謂之淋露九月霜降而雲謂之護霜皆東南方言

老去何曾健秋來白髮新萬方多難日四海獨愁人論

媿傾三耳年今已六身太平猶眼見知復幾青春

病骨駸駸老清愁日日深寒添青士節霜與木奴金跡

共雲無定愁隨月滿林幽蟲泣床下可是不知心

次韻遠猷東池晚思

多事馮公子含情不柰秋  
東池寄飄泊畫舫信夷猶  
烽尚連三月詩應擬四愁  
且須傾酒椀未可喚歸舟

次韻元素見寄

秋來烹鯉得明珠頗勝當年獲  
異書里社相從真是伴  
江湖作計未全疎  
愁須強把樽中蟻老亦寧思  
組上魚回望花姑溪北墅  
可能無路到華胥

人間何處不蘧廬  
匹馬來遊偶束書  
晚歲光陰頻入夢



鴈來消息莫相疎  
淮南乘興非關米  
筋下烹鮮喜有魚  
避地偷生落閒處  
功名無復似包胥

次韻王彥猷參謀避兵山中寄茶字韻詩卷

詩如摩詰自名家  
未數劉顛賦雪車  
問字誰攜子雲酒  
敲門擬送玉川茶  
回頭拾得風前句  
掃地先除眼界花  
老去無緣渾似夢  
相隨真欲問毗邪

扁舟流浪作浮家  
病齒凋零脫左車  
千里歸心秋後燕  
一年春事雨前茶  
它時我自開三徑  
此去君當判六花

相見已還平日願豚蹄何用祝汙邪

繡溪秋晚二首

羈客三年別風裘九月寒暮鴉啼日落紅葉墜霜乾地  
接淮山遠天浮楚服寬須江無父老舊事說曹瞞

二

不作黃花夢空悲紫塞秋淚懸江上點心結雨邊愁久  
客猶千里殘年念一邱倚欄多少恨暝色滿江樓

歷陽道中二絕

斜照孤村一水間  
維舟盡日柳陰間  
此生已作淮西夢  
更看江南隔岸山

江邊孤壘古濡須  
憔悴斯民百戰餘  
賴有豐年慰羈客  
軟炊雲子薦鱸魚

將別須江作

落葉江頭楓樹枝  
秋風又入去年衣  
淮南米賤聊乘興  
笠澤魚肥却念歸  
老境但知隨物化  
幽期常恐與心違  
羣山堂下山千點  
不見祠雲作雨飛

九日郡樓獨坐

西風斜日可憐秋已作重陽更上樓門外白衣來獨晚  
坐中司馬醉應休茱萸香在人何處黃菊花開淚欲流  
山意娛人不勝好苦無佳句若為酬

過雨二首

短日收殘雨西風送夕陽時光雙去鳥世事一炊梁卷  
箔山堆案翻書月滿囊諸君方給札不擬獻長楊

二

自落山邊日孤飛雨後雲樹將風報客天遣月爭曛詩  
苦窮堪忍兵強老怕聞殘更隨夢盡長日與愁分

次韻黃子才野步飯懷禪師道場

聞說尋山屐閒穿近郭村眼明山淨綠心愛水清喧幽  
事付餘日狂歌終放言地經殊代遠名為老僧存境勝  
醒朝梵蔬甘飽夕飡僧應只靈運客或是文園覓句聞  
吳詠投文弔楚魂夢時驚遠籟背喜曝微暎厯井窺雲  
窟窮山繞石根蹇驢當復跨促席未容溫兒輩休唾點

吾曹自引援濁醪聊共把蠹簡付重論歸和山中句挑  
燈老眼昏

十六夜月色甚明與客棹舟至普寧寺

昨宵明月共千里今夕極天無一雲不知誰令太虛空  
著此皎皎白玉盆長空與月慰愁眼良夜得酒含微醺  
天公有約不可負急蕩兩槳凌江濱更攜江上滿船月  
來打寺下三更門脩廊夜寂風葉亂古佛不語殘膏存  
老禪今夕但拍手狂客數輩空餘樽高談劇語天亦怒

白壁故遣雲相吞人言禍福真倚伏  
歡常有餘飲不足  
篙師促客歸去來夜半風顛浪如屋

朝盤二首

郭索何人捕草泥朝盤新見玉團臍  
却思烟雨江南夜  
紅火青蓑入稻畦

江近秋深足鱸材半青橙子帶香開  
黃金鱗鬣丹砂尾  
落紙看成白雪堆

磚爐

秋風吹孤鴻浩蕩去鄉國心悲淮山秋家近楚江側囊  
無狐白裘柰此風雨夕經營尺寸地便可寄幽寂磚爐  
規舊製蒲團買新織雖無琢獸紅可醉珠履客會當與  
狸奴曲肱分坐席急雪度寒廳夜窻鳴淅瀝詩成兀醉  
夢殘缸耿虛壁何必遊八關吾手自可炙

山鬼行

黑風夜度鷺鷥高黃狐出窟山鬼號江空人靜雪飛急  
城頭擊柝催鳴刁老翁愁寒小兒哭薪如黃金米如玉



將軍半醉獵城南鐵馬敲冰響山谷

次韻明叔九日見懷

準擬重陽共一杯幅巾臨水復登臺  
飛花撲面君相送落葉滿山人未回  
故國只憑幽夢到斷腸頻寄尺書來  
此生終向江湖老黃菊紅萸笑謾催

十月十九日江晴放舟

雲靜天無滓霜晴日乍暄風平初放纜  
江穩自流船賈客眠吹笛篙工坐意錢  
吾行聊爾爾百丈莫頻牽

雪後殊未有梅頗懷故山二首

淮山落莫水蒼茫  
雪在梅梢冷欲僵  
要與玉奴蘇凍骨  
不知誰有反魂香

真色生香無世塵  
參橫猶記夢回人  
風前懊惱梅花使  
不寄江南一點春

王靜翁言客有賦食虎肉詩者詞甚壯要余同

作

六郡良家家好武  
相試翹關恃負弩  
夜從惡少數十輩

醉上南山縛驍虎短衣匹馬不挽強虎而有翼誰敢當  
旁觀睥睨方縮手一鬻割鮮君已嘗平生飲血如甘露  
羞作車中三日婦但當一飽不搖喉誰說萬錢難下箸  
寢皮食肉君勿嗔席為人害當復去可笑長楊射獵兒  
日暮歸來數狐兔

次韻黃子才冬至日醉卧王丞家夢還家如平  
時

黃郎本天才驥足尚少屈平生嗜烟霞投老成痼疾乞

食方叩門攜幼未入室何為作斯遊瘦馬醉兀朝飢  
乃見驅妙思何由逸誦君思歸吟感我羈旅日道塗頗  
風埃歲月苦飄忽高須營一飽不愁屈兩膝可憐蓬閣  
姿未珥螭頭筆丞哉苦風流威令寬且栗懸知千里駒  
肯為牢之出胡為倚寒窻清夢恍若失但愁一線紅又  
過白駒隙婦眉誰與畫旅髮歸亦櫛呶嚶兒女歡餘事  
聽造物

次韻趙茂卿書事

自昔人高馬服名胸中有策似金城玉階方寸何由借  
榆塞風塵幾日清萬里有家無夢到一樽和淚與誰傾  
竹西回首揚州路腸斷故園春草生

王彥猷用色字韻見貽和答

人生殊用舍初不繫失得念君垂天鵬未作六月息佳  
人絕代姿蛾眉本傾國人皆倚市門孰乃有國色風雲  
倘復遇富貴或見逼一朝得天驥遂可空冀北况今登  
俊良百吏歸黜陟洗眼看橫飛故山勿輕憶

冶父寺

楚俗樂戰鬥征誅專莫教蛇豕肆吞噬一舉夷蒲騷

消音

小器良易盈舉趾凌雲霄輕敵取敗衄縊死由矜驕淺  
識恥鄧曼安在誇雄豪至今冶父山遺跡真寥寥何年  
化龍宮金碧爭宕堯眈眈羣於菟跪伏尾自搖乃知道  
力妙智數何能高曩者羅與楚蟻忿較一朝慈哀洗萬  
劫自足消兵刀道人結界地遠引離喧囂欲禮大士塔  
恨無野僧包臨風一悵望短髮空爬搔

賈主簿家蠟梅

臘月邊城風雨沙帶香誰剪蠟梅花  
寒燈枉作江南夢  
春在牆東主簿家

僕將南歸笑庵以詩見留次韻

思家一日似三秋病眼淒然怯上樓  
十幅風蒲催我去  
數枝烟竹為君留還將曉枕燈前句  
分作孤蓬雨後愁  
便合北來尋老伴人間何處有湯休

掛席

掛席下晴江歸從我北窻年今真晚晚事亦付奇厖酒  
可澆腸飲城誰緩頰降買田如有路誓欲老吾邦

歸自須江泊舟于湖舟中書事

一自風塵起飄零十載過危情窘荆棘老眼暗干戈草  
草真聊爾栖栖可奈何功名麟閣晚興在鹿門多避地  
依淮浦傷心聽楚歌邊烽明夕嶠戍鼓擊寒波江控曹  
公塢山連冶父坡憑高懷更遠弔古事應訛久客橫歸  
棹長年著短蓑風高飽帆腹潮穩轉山阿漸喜鄉音似



還成醉臉酡淒涼想茅屋留滯厭江沱井邑疎星火津  
亭長薜蘿連檣自來往壞壁本峩峩蜂目今何在黃鬚  
跡已磨餘生能幾屐急景付飛梭歲熟如堪隱詩成可  
自哦平生南畝願無地與婆婆

復故廬一首

并引○時  
歸自無為

余拙於生理閒居寒餓無以自活須江主人惻然念舊  
挽而之淮客寓逾年妻孥念歸乃返故鄉有廬數椽為  
貴公子居縱客夜飲籬落俱焚久之見還開門入室酒

肉遺臭不絕於鼻稍加營治而居之四顧雲山頓還舊  
觀喜溢於中言不能盡聊寓短章以寫我心

我卜我居於城之隅繚以羣山帶以清渠日出扶桑月  
翳金樞朝雲夕烟變滅卷舒喬木豐草蔚其周廬羣書  
在床濁酒在壺蹒跚簪裾亦復晏如淮水之遊誰脂我  
車逮其歸而四壁其徒柔柯既剪稚竹日疎山為改容  
木為槁枯吾亦浩然言念歸與今我來思為之躊躇屣  
屐在門鞿鞞在塗駕言曷歸杜門寔娛寒止靴豕飢止

瘠臞人誰不死馬識其餘

雪後留報恩方丈三絕

文脊坊邊雪作堆報恩溪上凍全開一天雲葉卷風去  
四面玉峰攢馬來

澆睡莫教茶乳薄留香不放晝簾開道人知我無餘事  
特為尋詩借榻來

老禪心地已如灰愁眼能令一笑開落日無情且歸去  
梅花若在却須來

張元明羅仲共賦郡池白蓮僕時在淮西十二  
月中休方德脩始出巨軸追和


花似當時傅粉郎不須湯餅試新粧固知桃李無國色  
猶恐蘭蓀是俗香人在匡廬新結社詩傳淮楚夢還鄉  
波沉不見香羅襪空向牛腰得夜光

送舜卿遊建昌

雷虞龍字舜卿好  
談兵出入軍幕

并門當日倚長城笑遣妖兒卷旆旌江上長鯨知已滅  
草中封豕不勞平十年當念瘡痍苦此日寧論戰伐名

虎帳夜談資  
婉畫為言  
竒策是休兵



太倉稊米集卷十五

欽定四庫全書

集部

太倉稊米集卷十六

八至

詳校官庶吉士<sub>臣</sub>李如筠

主事<sub>臣</sub>呂雲棟覆勘

總校官編修<sub>臣</sub>倉聖脈

校對官中書<sub>臣</sub>高中

謄錄監生<sub>臣</sub>范廷麟

欽定四庫全書

太倉稊米集卷十六

宋 周紫芝 撰

詩四十首

官軍屢捷淮寇漸平五首

遙傳班馬動歸心  
鏡歌馬上靜喧飀  
從此自應如振槁  
將軍勲業似淮陰

擁道行人撥不開  
檻車行看縛戎魁  
羽書便恐推門入  
知是淮陰露布來

風聲鶴唳是王師大似秦苻欲破時黃屋乍聞天一笑  
此歡應有近人知

棗熟梨黃河朔秋頗聞箕斂不勝愁迎師已欲攜簞食  
鬻高何勞費萬牛

新得降番壤地開玉觴爭奉萬年杯明年御棗紅千顆  
又見青徐入貢來

立春日聞捷

未獻椒花頌先頒鳳曆春亞釵雙燕小垂鬢綵幡勻兵



已知塵遠歡應與歲新  
遙聞漢天子喜色動中宸

題李彥恢家龍眠七馬圖

古來畫馬知幾人  
當時只數曹將軍  
龍媒貌得照夜白  
七十萬匹空雲屯  
但令韓幹作弟子  
未許韋偃窺藩垣  
風流掃地五百載  
始得龍眠空馬羣  
龍眠自是天下士  
胷中元有真麒麟  
寧王玉面久不見  
風駿霧鬣驚猶存  
四蹄翻風不受繫  
意在萬里絕馳奔  
安能局促鹽車下  
更與蹇驢分短轅  
先生既老誰入室  
後來只數城南孫

孫郎繼死骨又朽人間此馬如浮雲勸君掩卷勿浪出  
世無九方誰與論

題彥恢家仇池四石刻

伏波南來自交趾可笑汗牛推蕙竝人言包裹足珠犀  
誰識閒身謝簪履如何當年元相國胷中飽飲貪泉水  
胡椒八百亦安用坐此殺生真可鄙龍眠主簿亦兒嬉  
銀鈎蠶尾搜遺竒三年獨有一錢在歸來清節人皆知  
囊空安得紫絲帳車重只餘黃絹碑自言所至輒寓目

窮搜屋壁翻階墀不嫌尤物觸時禁恍然入手心驚疑  
君不見嶧山篆刻焚野火磨崖萬仞高崔嵬何如四石  
橫棊几左提右挈行相隨

正月十五日同圓明老師渡谿西雨作不可回

三絕

伴師同拄一枝藤野岸凌兢踏斷冰老去莫辜元夜眼  
試憑江閣看漁燈

舊時好客孔文舉無事長隨支道林燈夜羞歸對妻子

傳柑知我已無心

一別風塵客恨長  
鳳城燈燭記微茫  
人生相見知何定  
夜雨重來此對床

次韻和荅圓明老師二首

平生作劇謾逢場  
袖鑿由來苦未當  
笑我彈冠方適越  
看誰紉佩獨沉湘  
捧心政恐元非病  
怒臂前知不自量  
它日小松山下路  
合分風月與徜徉

回首雲庵日又低  
孤馭欲渡晚風吹  
桃花水暖拍隄去

蓮葉舟輕隨棹移老罷轉知身是夢愁來只有鬢成絲  
人間無地安雙足萬事從頭媿老師

次韻元素賦余新居

一樽能此共窺臨草色淒迷步履深黃帽青鞋聊偃蹇  
白衣蒼狗自浮沉瓮頭酒熟須同把窻下詩成亦共吟  
待得吾廬真可愛更須繞屋樹成陰

元素再邀同賦

載酒何人肯見臨情於老伴莫嫌深誦君詞賦疑仙去

笑我功名付陸沉，且可閉門留客飲。  
不知擁膝是誰吟，幅巾趁取春猶在。  
來聽黃鸝喚午陰。

元素再邀同賦

家住三峯頗下臨，畏人小築不辭深。  
南齊謝老棲空在，東海麻姑信已沉。  
恨子不當青瑣闥，伴人猶作白頭吟。  
我窮無物能娛客，只有蒼梧滿地陰。

望故廬一首

并引

余有先人敝廬，邈在城南。建炎之亂，焚蕩靡餘。後徙卜

陵峯之巔下視舊址隱然在目前乙卯季春二十有六  
日晚雨新霽夕陽滿山遠目所遇可數毛髮稚子指故  
處以示余望之悵然念昔遊之如夢悼海宇之未寧乃  
繼前篇聊以見意

龜城去江邈在一隅我家龜舫亦足軒渠草耕木如瓦牖蓬  
樞有客二人寔邀望舒長鬚之奴玉川之廬何必仙去方丈  
蓬壺何必校書起居何如無禍為福徐行當車我乎誰交誰  
乎我徒春蛙嘈雜夏木扶疎大盜遽起山摧海枯我焚其巢

將馬適與善刀而藏為之踟躕望我故處宛其在塗我友  
云亡云誰與娛願洗甲兵肉四海矍奠我新宅以飽三餘  
次韻趙戒叔燈下見榴花明日重午

醉帽風前著榴花燭下看  
嬌妍為誰好流落未妨歡  
故國應千里歸塗夢百盤  
明朝是重午努力願加餐

次韻戒叔增明閣晚眺

朱閣瞰流水曲欄橫  
晚天薄雲初過雨  
高柳却鳴蟬  
杖履且終日風塵今幾年  
莫將懷遠句重說舊林泉



劉公祠

劉晏燕人以救  
宣圍戰沒

昔歲金人始南渡官軍夜遁如脫兔孤城何啻累卵危  
勁敵不殊羣蟻附夜提王師來解圍燕中老將如猛虎  
平明橫槊屬兩韃足馬馳從敵營去崢嶸但謂氣可吞  
倉卒不知身已仆平生三箭得天山白骨看成一丘土  
馬前班劍不動塵猶勝車中三日婦

送江子

六朝固陵夷佳士亦間出風流數後來諸江有人物總

持偉文采文通頗超越清忠若休映對賊能抵突定知  
蘇屬國不為延明屈斯人黃卷中願見未可必誰知有  
來雲遂入諸子室相從忽三年不見無十日人生會相  
別此別殊慘慄相望渺江湖時危盜如櫛願言加餐飯  
栖遲且蓬華時來亦騰騫安用苦密勿尺素倘可通公  
當念伊鬱

次韻聖謨見寄二首

十年悲兩京萬騎開幕府誰知鹿門翁遠引脫罪罟吾

哀固安用文字考前古尚煩金蘭交弔此飢寒苦龐公  
不可見賤子何足取

青衫幾痴兒歛版上公府固應橫海鯨不可汙池畧高  
才乏近用初不異今古功名亦偶然慘戚良自苦富貴  
如公等唾手自可取

次韻木南稀見贈

上章分得鑑湖春賀老前身恐是君常病薰猶難共器  
豈容雞鶩可同羣已無若若纍纍意頗坐竒竒怪怪文

稍許白頭親杖履少年功業付終軍

蠹魚

山堂夜雨如決渠黃梅半熟書生魚樹頭朝日忽復出  
聊向空階翻故書老人耕鑿無膏腴緇囊細字時相娛  
自欣引睡得黃嬾便恐無意呼青奴讀書本不求甚解  
姓名足記知有餘此蟲何乃徒飽腹死葬書葉真痴愚  
不如化作石帆山下蠶織成吳綾光滿眼乞與袁娘作舞衣  
常把花枝侍君輦

西齋聞禽

時往  
池陽

西齋草樹頗蒙密竹暗城頭不通日風晴高柳恰飛綿  
花盡黃蜂未成蜜北窻也復可憐人亂離十載空傷神  
病對青山疑是夢眼驚新綠已無春羈懷有句暗不吐  
終日無言聞鳥語寒窻窈窕不嫌風晚色溟濛却宜雨  
穿條隔葉止復啼白粉畫眉金作羽應為山翁久慣聽  
聽久不知心轉苦廟堂何日議銷兵攜手尚堪歸樂土  
還我花姑溪上椽卧聽春禽轉桃塢

五月二十九日對雨懷舊

危坐東窻日自長  
幽人不出雨何妨  
未論飽飯三秋樂  
且說高眠一枕涼  
晴後却疑猶點滴  
夜深應是更淋浪  
此聲有味知誰解  
安得君來與對床

余既作前詩已而復晴  
客有誦余舊詩者其畧  
云開門更待西南月  
無客來分上下牀  
聞之恍然如夢中語  
漫不省記為何詩也  
乃和前篇以足之

貧共閒身味轉長  
雨隨農事不相妨  
莫嫌旅枕喧朝夢  
要與書檠作夜涼  
黃犢催耕思莽蒼  
短蓑垂釣念滄浪  
開門更待西南月  
無客來分上下床

後二日望東南大雨久之白龍翔於雲間掉尾而  
上老農云白龍見則早祥也

白晝鈎簾望處長  
初於眼界了無妨  
坐看雲嶺埋烟雨  
聊借西軒作晚涼  
卷水翔龍方矯矯  
轉山飛瀑更浪浪  
豐凶許事誰能問  
獨對殘書月滿床

旅夕

秋雲翳長空微雨餞殘暑新涼入郊墟中田熟禾黍秋  
蟲自知時入我床下語西風幾何時秋意遽如許曉色  
催鳴鷄孤砧急寒杵遊子未得歸留滯在江浦生理思  
田園飢寒念兒女持此兩鬢霜世路復焉取起視夜何  
其江月方欲吐便當隨孤鴻雲霄肅雙羽

次韻章季常見予所賦彥恢家七馬四石二詩

灞陵老将身未戾連城價重誰當酬龍眠三歲亦何有



滿載緇囊歸汗牛蒼珉照眼裂蔓尾尺素抹電飛驂留  
春風吹晴作妍暖棊憲剝啄驚紋楸慙慙喚客出奇玩  
一笑終日君家留此郎曾中有奇策未能竟借前著壽  
波瀾收歛入詩律報章還得明珠投九重真龍想天驥  
入木八法餘銀鈎只今尤物不到手空花老日生雙眸  
章侯嘆息恨未見但聽寒雀空嘲啁平生歎乃不成曲  
無聲可和綿駒謳

次韻季常疊前作見寄

人生富貴如五侯，祿豐位大功，不酬朱輪華屋，令人羞。  
一蓑不如歸飯，牛自駕，款段馬少遊，勝驟玉腕尚書，騶  
少年蹭蹬在邱壑，晚歲風雨悲梧楸，江邊短艇苦喚我，  
此心勇往誰能留，幽期正怨齒髮悞，事定不須龜筮籌，  
言雖太漫君莫笑，與語俗人真暗投，香杭炊熟碧鱸美，  
橫江已辦秋風鉤，曾中宅日幾雲夢，四海不勞圍寸眸，  
肯聽兒女昵昵語，秋蟲悲笑徒啾啾，啁陽春白雪一落耳，  
竹枝淒怨慙蠻謳。

次韻馮遠猷觀水

帶雨山雲晚尚繁黃流先已漲江干海邊鷗鳥恐不下  
濠上遊魚誰肯觀錦里十家俱半壁龍門八節定無灘  
早知四載歸神禹疏鑿誰能泄浩漫

次韻子雍同達書記遊安林

江湖流落一烏巾同障西風滿扇塵試為支郎吐幽句  
了知長吉是前身欲寬江上三年夢更碾禪房一掬春  
不為相逢苦相挽行吟應在楚江濱

遠猷家高麗松扇

三韓使者身堂堂手持漢節歸明光寶刀不受戎王燕  
便面空含風露香雙鸞織花大如月凜凜猶餘歲寒節  
莫將七寶畫團樂乞與誰家小桃葉

西齋金鳳花開百餘日相繼不絕難其能久而  
惜羣芳之不留也

昨日晴天花滿樹今日風前已飛絮  
閤花可是天與紅  
着意東風吹不去偶然乘此花樹空  
遂擊春暉學飛翥

人間此鳥久不出擬欲高翔入鷓鴣凌傲風光不自羞  
狼藉空庭復誰覩自應斂衽避芳塵一笑非關迫遲暮  
可憐開謝百日中浪遣花神費調護嶺梅何事挽不留  
零落風枝怨寒沍

贈別木南稀

月下吹簫王子晉醉中騎馬頌知章無家只賣文為活  
有酒聊憑醉作鄉夜雨對床驚客枕秋風無淚把離觴  
閩州此去如天上說着城南只斷腸

徐使君新作採菊亭

使君占吏師老手便治劇論功飲無何課最上殊勸人  
言神爵中有此二千石擁麾幾何時千里靜森戟遂移  
佳菊苗步着東籬屐南山忽當眼淨几分晚碧黃花行  
欲開吹帽盡佳客豐年公事少閒日頗自適便恐趣公  
歸翺翔步丹極曉枕夢催班朦朧想山色

陪徐使君登秋浦樓

白髮衰顏已倦遊倚樓端為使君留天連遠嶠雲埋樹

波撼孤城水繞樓有客自傷愁外眼何人解寫雨中秋  
世間無此登臨勝休把城南說閩州

二十三日雨霽再陪徐使君登秋浦樓

細雨愁雲特地晴重來水秀復山明江風吹面滄波動  
嵐氣侵衣翠潤生南浦落帆催畫角麗譙殘照滿雙旌  
未知九日齊山會樽酒何人與共傾

太倉梯米集卷十六



欽定四庫全書

太倉稊米集卷十七

宋 周紫芝 撰

詩五十首

睡起題西齋壁

熟睡閒歌一幅紗夢殘庭樹落疎花屋頭正喜鳩喚婦  
墻下忽聞蜂打衙

題劉生畫王子猷嚴子陵二圖

人生不相知相視粵與秦臭味倘復同萬里心相親何

必兒女曹爾汝相怨恩浩歌反歸航詎識此意申

二

四皓挽復來子陵呼不起天下復歸心兩京同一軌義  
重勢乃輕理自固應爾賣菜苦求益可笑真俗子

登杜牧之翠微亭故基

秋草無情上舞臺清江猶抱故山回紫微郎為誰攜酒  
斜日西風菊自開

中秋大晴採菊亭對月

風與秋容一樣清雲隨風盡十分晴江從採菊亭前過  
月到雙梧頂上明塞草又黃人亦老霜鬚渾白酒還傾  
不應造物知愁極故着玉蟾娛老情

秋蝗歎

驅車入秋原懔懔盡禾黍田父刈且歌笑言雜兒女路  
傍騎馬翁下與田父語問言田家勞云何樂如許父老  
仰天歎懇款話心膂今年遭歲凶夏旱連秋暑誰知勤  
餉婦社甕莠綠醕君看西來蝗落地輒蓋土入境不入

田食草不食秬老農亦何幸此樂詎天與為言相君賢為  
惠寔在汝羣兇滿江淮殺氣自消阻微蟲初何知仁者亦復  
與知公意在民有穀寧忍咀勸爾但自歡煌來不須禦

謁昭明祠

歷年有攸歸脩短良亦異天乎不祚梁斯人乃即世於皇  
元良資盛德真豈第高文貫百家妙學窮六藝悠悠悲  
徂年凜凜尚生氣偉哉千載人享此百世祀金朱煥靈宮奔走  
恭祀事遐瞻儼森寒神雨倏復至偃倭奠椒漿悲風

蕭蘭佩想像折芳馨茲焉獨長喟

次韻元傑聽谿亭見寄

貧病相牽各異鄉心隨南鴈與翱翔感君三絕出妙手  
慰我九回縈別腸山色為人分淺黛泉聲何事碎鳴璫  
千岩萬壑山陰路誰與臨流共一觴

清樾晚雨效韓渥三絕

池上風荷香撲衣紅粧鏡裏雨如絲試呼小艇尋烟去  
便是苕溪五月時

白鷺一隻飛暮靄亂鴉無數立官樓角聲吹盡欄猶倚  
雨落黃昏人白頭

黃昏簾幙人誰卷暮雨闌干客自憑獨自不知多少恨  
一池荷葉碎秋聲

齊山有岩穴宛轉山間秀色可喜號小九華

哀容迫遲暮驅車厭行役路逢玉孱顏庶用慰愁寂誰  
知九鳳羣曼與秋水隔落日自淒迷轉盼失虛碧幸茲  
登臨間會遇晚乃獲玲瓏八九峰模寫在尋尺鬱雲開

層巔飛瀑掛蒼壁凜然削寒玉秀色粲可摘緬懷融結  
初爰業自開闢懸知孤客恨為了愛山癖聊將小岩壘  
入我尋山屐何時解塵鞿卜築在泉石遂當挹諸峯羅  
列歸几席

齊山依小岩作觀音閣

亂山空洞自成龕十里秋風響檜杉我亦來脩香火供  
便疑身在普陀岩

池口觀樓船

湘水妖氛靜樓船盡日橫風濤心自恐舟楫眼初驚伏  
莽膏金鉞將軍駕木城太平無此物指日望銷兵

飲酒三首

高皇掃強秦縱橫成妙畧三傑豈不雄曾不出籠絡曹  
參晚為相痛飲事杯酌當知清淨化寓意在酬酢魏武  
獨何為屢下禁酒約兵戈纏九州猜忌恣暴虐堂堂孔  
北海醉語雜諧謔斯人猶殺之四海何由廓古來成敗  
事紛紛真一噓



昔我在田畝薄言事耘耨種杭亦種秫可食蕪可醪清  
香滿寒甕夜滴喧春槽洗我玉花甕酌此鵝黃膏閱歲  
更闌茂下田但藜蒿里胥厭追索縣籍書逋逃邇來兵  
火急斗粟千錢高不飲動逾月憔悴成楚騷丈夫命運  
薄困阨例所遭究竟無如何隨緣且陶陶

濁醪有何好所貴資清歡如何畢阮輩頭沒杯案間我  
飲但涓滴而作飲酒篇兒曹見之笑謂我狂且顛政應  
坐自失說夢痴人前一酌憂已亡再酌當陶然此意但

自得此理詎可言萬古一淵明何由與之論

秋晚念歸

風寒黃葉未全落露重流螢已不飛惆悵西風秋欲老  
旅巢無定客思歸

親征詔下朝野歡呼六首

茫茫禹迹混殊方誰遣中華作戰場今日澶淵尋舊役  
會看兵氣掃欃槍

天戈未指敵先摧掩耳誰能及迅雷便遣風師清輦路

奉迎北狩兩宮回

誰信妖兇膽自驚  
君王親駕六駢行  
江邊紅日三更出  
怪得撓槍夜不明

漢業當於馬上成  
謾勞諸將久經營  
廟堂早扈南陽駕  
已為蒼生洗甲兵

雉扇遙聞擁翠鑾  
遠方耕鑿尚偷安  
誰知黃鉞臨戎地  
江上秋風玉帳寒

請看介子請長纓  
白髮書生百不能  
誰掃浯溪題歲月

漫郎端欲頌中興

青陽道中望九華諸峯作

平生愛山意，瞑目想竒崛。東面號多山，萬嶺空崒兀。不知鑪錘工，鑄此一尤物。峯巒與天近，紫翠爭日出。何年飛三山，此事亦恍惚。要欲移嵌岩，下作仙聖窟。我願從之遊，飛昇蛻塵骨。山行尚悠悠，客意殊忽忽。弱水不可渡，瘦馬聊自兀。落日回寸眸，飛鳥但滅沒。

次韻呂仁父教授題余秋浦詩卷

時歸自池陽

病客還隨倦鳥翰  
霜風猶帶客衣寒  
誰持馬上歸來句  
換得天孫雲錦端

汗漫誰從食蛤遊  
歲窮真似賈胡留  
恨無摩詰丹青手  
貌得瀟湘兩岸秋

試從秋浦望長江  
猶有遺蹤在渺茫  
滿地黃花秋日晚  
傷心不見紫微郎

燒芋

幽人日晏方索米  
朱門醉頭扶未起  
人微何敢望一困

鮒死知誰濡斗水糞火撥灰聊效顰玉糝誇羹未須爾  
紫團包玉不洗泥火候初勻香透紙從來真味貴天全  
大羹不致名太始饒涎為止翁欲顛飢腸不鳴兒更喜  
口腹為災莫漫誇五畝應須急料理但托長鑿仍短鑿  
誰能畏首復畏尾未知春雨荷鋤歸空羨吾家燒芋美

十二月二十九日雪中煮茗

旋掃飛花煮玉塵一杯聊餉作詩人未知折脚鐺中雪  
何似浮蛆瓮裏春

雪後小霽擷菊苗薦茗

短窻烘日見深明  
墻角泥乾路欲成  
槐葉索淘春漸近  
菊苗薦茗雪初晴  
寒藜且對天隨子  
大白誰浮阮步兵  
願借芳香明老眼  
要翻書葉送餘生

小兒漬蜜雪見餉用前韻

黃蜜香和糝徑塵  
紫蘭兒餉白頭人  
誰知茅屋三冬雪  
中有蜂房一掬春

雪後北墻

攜兒一作北墻行泥雪初乾杖履輕病後茶槍渾不要  
眼前蔬甲喜全生鳥聲漸軟春應近梅萼催香日自晴  
忽憶讀殘書未了却須歸趁小窻明

冬至前七日極暖

風日炎洲似暄妍趣歲華三冬開整戶十月見梅花翠  
管書雲近黃羊賽臘賒却愁遲暮雪隨意作橫斜

冬至晚晴可喜

雲物纔書雪未稀樓臺忽復帶斜暉日從銀色界中出



鳥向瑤池影外飛可忍便教烟欲暝會須更待月同歸  
羣山即是三山頂八極聊將寸目圍

送黃子才還姑蘇用陶淵明王撫軍座送客詩

韻

歲事忽已晏行邁良亦腓誰知出岫雲意作無心歸嗟  
我寡徒旅隻影曼無依况乃遠離別與子千里違中原  
念亂久意緒轉愁迢迢兩溪水淡淡浮斜暉豈無雙  
潁尾尺素不可遲慎勿不相念棄置忽如遺

奉寄黃端冕用送子才韻端冕其猶子也

至言如秋霜既肅百草腓諛諛忘中正千古良同歸倘  
無馥槩士舉世將疇依袞職或可補鼎鑊安得違所以  
長沙傳慟哭為時悲讜語數十上子今有餘暉我欲從  
之遊周道苦倭遲倭遲不足惜子言願無遺

陳公園梅極盛頃嘗與客遊觀花下兵盜十年  
今復過之追念存歿愴然有感三絕

忽憶梅花空斷腸十年依約夢中香如今濯錦江邊路

不見栽花黃四娘

玉雪驚看亂後枝梅花雖在鬢成絲當時一醉還如夢  
今日嫣然復為誰

溪上長眠雙玉瓶只今誰在復誰傾花知何事遽如許  
人亦看花太瘦生

紙閣初成

小閣春溫借隙光風簾不掛最宜香  
窻前睡鴨吹雲縷  
聊與幽人度日長

除夜雜興三首

華髮日就槁萋萋如秋草秋草剪復生髮禿不再好雅  
意憐兒童軟語媚翁媪白挽流光持盃錫難老我老  
不足惜汝生念不早兵戈常在眼流離猶滿道且當筭  
殘缸瓶空莫辭倒醒視夜何其東行日杲杲

憶昔元會日漢家全盛時奉隨觀國賓得見漢官儀中  
郎授國璽屬國欽朝儀萬邦瞻咫尺龍姿喜元知皇天  
厭久治夜見蚩尤旗微生脫九死飲此除夜卮河陽狩

未還螻蟻何足悲

昔年避羣盜夜竄蒼山阿  
偷生歲忽杪妻孥共婆娑  
村醪薄如水我顏安得酤  
夜半黑風起過門驚荷戈  
今夕復何夕奈此歡樂何  
人生不自保聚散如羣讎  
更當增蘭膏照此盃中波

立春日雨中三絕

滿天雲物正垂垂何處青春欲到時  
花信未從風裏得  
豐年先自雨中知

先自逢春老倍傷  
兩簷疎雨更淋浪  
眼前無復新幡勝  
只有寒蕓照庾郎

春光先已到誰家  
風裏釵頭小燕斜  
只有幽人了無事  
卧看疎雨濕梅花

張載楊示元道州詩卷羅仲共有詩在卷尾次

其韻

吾道嗟牢落斯文得主盟  
馬從西極到鳳入九霄鳴翰  
墨推前輩篇章集大成  
向來侯叔喜何得有新聲

正月二十七日種木瓜五株

三峰真奧區陸海富佳實此物冠九州未數梨與栗園  
丁力扶持璀璨成妙質鏤花淹宿露紅暈生晚日玉顏  
醉自頰豐肌滑仍窈風味照盤殮名字愈痺疾衛侯報  
瓊瑤盛德豈埋沒野人獻根株春雨助芽蘗何當垂露  
顆照眼行突兀疇敢與荔子飛電爭置驛况復具苞苴  
緘封鑽巨室一酌呼吾人甘酸漬崖蜜人生鮮知味相  
餉不可失

正月二十九日種柳三十五株

故國兵火餘壤地日窘感千里無雞豚遺禍及草木火  
攻阨焚巢雲棲急新卜尺地無寸麥山腰見茅屋小徑  
卧修蛇縈迂繞山麓垂楊剪孫枝封殖勤養育正須清  
陰成門巷森結曲微風惱春絮細雨滋淺綠悲涼聽殘  
蟬徒倚捫飽腹種德須百年種木十年足十年吾已老  
光景日夜速吾事倘復濟亦足快所欲何必羨張緒  
風流標簡牘



欽定四庫全書



太倉梯水集

太倉梯米集卷十七

欽定四庫全書

太倉稊米集卷十八

宋 周紫芝 撰

詩四十八首

憫紅椒樹子作

東籬委榛菅狼藉紛瑣碎披藜得紅椒磊落本誰藝蓬  
窠頗自矜枝葉相掩翳日月空復明雨露不霑施結根  
一失所理没苦憔悴移栽俯西軒吾乃借一臂要令遠  
條且密葉敷晚翠秋霜染丹砂紅寔相點綴馨香發潛

德錯節振淹滯人生良可惜會遇亦難值生理倘復存  
餘恨當棄置

憫白菊兩枝作

鮮鮮凌霜菊艷艷粲雲綺團欒雙毳枝婆娑照窻几頗  
訝銀臺俗深憎澤蘭紫瑣碎懸萬鈴金錢坐堪擬彼美  
誰家姝軒然兩仙子一登君子堂衙官列桃李殷勤極  
調護出斛埋地底結草障飛霜分渠泄流水那知病根  
株咬齧遭蠹蟻人生意外憂多智亦謾爾朝來踏雪泥

呼奴亟移徙東株真已萎西株有生理  
萎者不自持生者能有幾君看金谷園  
花木亘百里忽然竒禍作過眼盡荆杞  
悠悠可奈何歸步一笑喜

山居聞蛙

憶昔東南居結屋古城背野色帶危墻  
花陰弄寒砌月彩淡微雲春風入衣袂  
萬籟悄無聲獨立與誰對殷勤古壕蛙  
為我作鼓吹號昏初雨三闌雨忽鼎沸  
懸知世俗憎自可幽人意兵興如電速  
十年滿天地弊廬飛劫

灰生涯轉零替爾來三間茅風雨僅可蔽青春不改色  
人事有興廢一聞羣蛙鳴懷舊如夢寐撫事為嘆嗟傷  
心極流涕

二月四日大火吾廬獨免

顛風盡日惡頑雲吹不開行人對面不相識千巔萬嶺  
沉風霾不知誰縱一炬火坐遣萬屋成飛灰我聞人火  
曰火天火曰災茫然不復知從來但見通衢半瓦礫男  
呻女泣聲酸哀避兵十年常作客幾見連甍變荆棘此

生憂火復憂兵一事不成頭雪白學禪靈運本忘家好  
賦子雲終有宅向來窮巷冷如冰今作權門手堪炙驚  
魂可招烟欲消茅茨猶在書脫厄心知造物可憐生留  
與雲窻看山色

二月五日再火吾廬復免

昨日北風如箭疾城南一燎三百室城西片瓦不復存  
今日風高火仍急池魚已作沸鼎焦槁木那容飛鳥集  
糗糧不峙恐民流樓櫓俱空憂盜入傳聞此火頗異常

宋衛陳鄭實同日城中有屋無二三道路橫尸十六七  
三州飛報急上聞詔書亟下隆寬恩既令折券已逋責  
復振倉廩蕪窮民東南無事官失職火政不脩戶無積  
坐令惡少恣焚燒更以深憂貽玉食小人何幸獨晏然  
飽食懷慙面仍赤

羣不逞乘時縱火以病良民有捕於官者輒送  
遣之或厚與之金使之出境二月二十八日  
敝廬為惡少見焚雖復僅免而官不為直不



能言安三月六日徙居寓舍

平生有窟如屋鼠亂後飄零無定所身隨海燕作去來  
心似賓鴻識寒暑異時無地著妻孥晚得三間蔽風雨  
邇來憂賊夜不眠惡少屢來窺屋山不知今夕定何夕  
忽置束緼茅茨間念非曲突可得免何由外戶常不闕  
公庭得賊盡縱遣上訴官曹多怒顏青山元與我有約  
俗駕苦遭神勒還山光無情鳥不語主人當去心依然  
人生泛泛水中鳧身如逆旅家蘧廬東西南北皆可爾

夢幻泡影真須臾只今兵猶滿天地黔黎誰復能安居  
鳴泉繞屋花滿眼有愜况足翻吾書暮年卜築倘未可  
且借一椽聊自娛

醪醑盛開伯頰許攜酒

洗雨梳風玉作肌溫泉初試太真妃莫驚霧帳人方睡  
怕作風軒雪又飛未有酒樽酬玉艷枉教春色到柴扉  
詩成不為花遊說要看山翁倒載歸

上巳日雨中小集

老去傷春頭緒多  
花前不醉奈渠何  
重來倦客還脩禊  
已去蕃兵却渡河  
薄酒為人澆魂魄  
惡風將雨作么魔  
世間何事非陳迹  
莫謾相逢說永和

書溥師房六言三絕

茗椀要看三昧齋  
盃來飯伊蒲坐對禪  
房花木夢成午  
枕江湖

長卿自是倦客支  
郎殊復可人懶識  
閒中味好老於方  
外情親

罌粟湯翻白雪梅花句嚼春冰助我看山老眼借君倚  
壁枯藤

次韻任道卿見寄

連壁終慙玉一雙何曾有句似澄江九霄鴻鵠終掀舉  
三峽波濤看擊撞長袖婆娑終解舞短歌哀怨不成腔  
詩壇老將元無敵合為奔軍作受降

次韻道卿登樓有作

謝眺樓頭烟樹低雨餘簾幕捲雌霓山從雲外分千疊

水自天來落兩溪南園飛紅香滿砌畫橋春漲綠平隄  
登臨日日傷愁眼欄下夕陽還復西

次韻魯菴道人

一事無成雪滿顛漫憑老眼寄韋編誰將愛酒周光祿  
錯比能詩孟浩然心與功名無宿約天分泉石了殘年  
相過更待秋風老來釣琴公斫鱸鱖

夜雨達旦枕上作

夜雨不復止寒聲曉仍酣懸知變平陸天水相溶涵今

年春雨多既失麥與蠶五種殊未入此雨寧可堪日者  
諸大將幕府開潭潭連營跨淮楚仰食江以南郡縣脫  
兵火百城無二三何以供屝屨坐貽有司慙是事姑且  
置我窮誰共談有茅兩三椽往往如漏籃中夜屢起臥  
吾寢安得甘晝止方稍稍暮作還甦甦了無山鞠窮何  
由禦烟嵐有躬不暇閱憂心顧如快何當煩雨師驅車  
反龍驂一飽庶可期寒餓少已諳小人無遠慮口腹空

饒貪

重午日晚眺

野艾傷心碧藜流滿意紅  
兵戈人事別風物歲時同  
山倚斜陽外江橫醉眼中  
楚冤終未洗誰為餉絲筒

六月八日始開北窻得數峯于林樾間命力斬  
惡木而山態始盡出

老去捨輕舫小室坐懸磬  
六月不出門端居閱晨暝  
安知咫尺中有此大殊勝  
今晨穿北垣萬象忽輝映  
太虛本無窮眼力恐自竟  
遙岑蔽清樾了不赴將迎  
翠幕空

繁柯烟鬢入幽凭，雙峯始幡然起應。高士聘長瘦有餘，  
光名與天地。巨馬鬣亦已頽，蓬顆沒微徑。茲山與周旋，  
安得往脩敬。斗酒時自澆，先生醉初醒。落月掛長松，悲風  
繞危磴。哀回想音容，彷彿聽嘲咏。

七月十六日晚雨已而月出

將雨日已晏，既晴天亦曛。風從莽蒼來，雲向西南奔。忽  
于蒼玉玦，擁此黃金盆。我居在山頂，升沉閱冰輪。三年  
東岡頭，入我圭竇門。平生金蘭友，老去無一存。願言結



神交相與論素心素心不可說月亦終無言

暑夕

卷箔日已落移床月未來蛙號還作吹蚊聚竟成雷我  
自羲皇臥誰分河朔杯更憑風露夕小為洗塵埃

夜枕

夜枕歌殘夢寒燈照白頭樓空千嶂曉簾冷一窻秋時  
事兵方急天星火已流欲尋三徑老何日兩京收

中秋月下懷西山亭示周都曹

頑雲撥盡玉團欒飛出青天白玉盤月似不關常夜白  
風應先作九秋寒興來有意攜雙屐夢去還思把釣竿  
遙想風流三語掾不知誰共倚欄干

次韻道卿咏雪約遵歐陽文忠公令不得用鶴

玉潔白等字

魯史書平尺王春喜可占弄寒初照砌逐吹旋紫簾水  
遠還迷望山高遂失尖欺梅時滿樹妬舞或陵檐鶻凍  
痴如夢兒嬌喜欲拈人應橫短櫂誰且臥窮閭壯士知

何畏哀翁亦懶覘打窻時  
款款拂帽更纖纖  
獸炭寒仍在  
駝裘晚自添  
鷓鴣茶椀釀  
鸚鵡酒杯甜  
歲事新愁破  
詩章舊令嚴  
遥思庾樓夜  
萬里一寒蟾

用晦訪別為作長句

東風吹雪滿征鞍  
奪我瀕湖一笑歡  
老病不堪頻送客  
亂離容易莫求官  
故人知有山公在  
遊子應憐范叔寒  
留得餘年可相見  
不須回眼淚闌干

十二月二十六日北墻捫虱

今晨頗無事步遊古墻根眷茲萬家邑稍苦三戶村于  
時積雪散復值朝陽溫解衣聊自得班荆與誰言款欠  
良已久吾虱庶可捫平生謝淩刷懶惰從朝昏坐令邊  
縫間朝生暮仍孫回臭比跣香位卑道仍尊與世倘無  
求中有至樂存勿語兒女曹此意難具論

次韻道卿觀諸葛生製筆有感而作

任侯富三冬志在食五鼎平生名教地不對紛華境細  
書抄蠅頭何當避炎冷毛錐捐脫兔高與堆阜等遂呼

東郭統一一拔項領妙製窺良工危坐銷日永  
錙銖辨柔勁束縛較歌整那因將軍恬始拜管城  
穎乃知鬻伎窮不異束麻藜芑直入朱門蠹艸不  
窺省吾曹坐書痴微言姑自警他年草玄窻長物  
俱可屏潛夫倘或著封禪慎勿請相過有餘日會  
待風雲靜

次韻靜翁雪晴有作

曉天晴日麗朱樓殘雪晶瑩客舍幽寒柳江梅渾  
欲動官軍寇騎幾時休頗無佳客堪同醉當為衰  
翁作少留

便典春衣買春酒同將一酌散千憂

次韻道卿效離合體見贈

穠李有佳色不如蘭芷香鳴禽矜爪觜肯入鸞鳳行若  
士自有偶俗子自有腸驗志貴同術異趨徒參商望羊  
久自歎相思不相忘偉哉德祖賢長年與徜徉逢君青  
雲衢弱羽難翱翔槁項與黃馘珠玉儼在旁唧唧秋蟲  
吟敢賡韶護章夜光入我室什襲徒珍藏

早歸

野日破朝霧宿陰回暖風人家村崦外春夢竹輿中天  
碧鷺斜起水深桃臥紅山陰幾岩壑應接自無窮

題徐伯遠渚堂

徐侯當登瀛結屋在幽渚于焉窮心迹無乃異出處西  
風肅高秋黃鵠時一舉自謂可過之邱壑出肺腑俗眼  
殊未高此意吾竊取長卿少倦遊征衫浣塵土羞陪漉  
酒翁共作斜川語魚鳥雜冠巾蒲蓮暗樽俎江湖滿天  
地置身豈無所黃帽與青鞋造化久見許平生釣餌興

臨老尚齟齬茲懷固泯默感激聊自吐安得戴笠簪孤蓬聽秋雨

次韻道卿嘗新梅

梅梢着子葉青青紅萼猶存味已清竹外一枝和雨摘  
釵頭雙蒂為誰情雪霜自是元同操榘柰何由與並名  
商鼎欲調應有待不隨鹽豉下尊羹

送元楷官義橋

相見還須復語離更看花雨濕征衣樂丞有酒聊自隱



季子無田安得歸長釣不妨垂白雨亂帆時看落斜暉  
何時去作津亭客更待秋風一葉飛

次韻道卿喜賊平

時東南  
初定

無人試請一長纓賢似防邊萬里城共說廟堂初奏凱  
似聞淮海已無兵黃頭父老農桑晚白面將軍劍佩榮  
息馬投戈知有日黑山青犢已先平

小兒生日

錦里先生聊醉飲玉川居士以詩鳴人言驥子能扶步

天遣添丁欲助耕窮苦助吾緣底事飢寒憐汝若為情  
相看只有身長健共瀝餘樽作小頰

林老借可正平詩編以詩還之

蘇家人物自有種法護且放僧彌賢誰知癩可東溪句  
參得涪翁雙井禪落葉飛雲空自好流風回雪不成妍  
更須點檢新編看恐有隔林機杼篇

送羅仲共罷酒官歸山中

虎額一山同避賊草堂三月更通家音容久隔頭俱雪

雲霧相看眼各花晚厭微官猶麩藥早知豪氣已聳牙  
北扉青瑣真如夢且復西谿踏釣沙

次韻常元明見寄三首

月明鷺鵲未安巢生事如僧止一包但得有門容看竹  
不知何地可分茅愁來漫載盈鴟酒老去難穿中鵠鶻  
獨有詩緣難洗盡強隨春鳥作啁嘲

已分功名噲等高平生誰問六花包千頭願種封侯橘  
三脊仍慙縮酒茅亂後詩囊成長物夢中驚胆落飛鶻

我非執戟明光客，知有何人肯見嘲。

我如病橘綴寒梢，璀璨何由入貢包。交舊半應歸宿草，  
亂離真已壓前茅。毛錐早信難當敵，銅弩何由學射鵝。  
願借瀾翻千偈手，為余一洗向來嘲。

次韻道卿瑞香

春意催花不自禁，紫團猶復畏輕陰。蘭蓀有意窺芳馥，  
桃李含羞漫淺深。鬪鴨並欄風冉冉，紅油垂幕月沉沉。  
任郎便是花東道，不學香山夢後尋。

次韻道卿竹間桃花盛開

玉立疎疎不滿欄，小桃宜向竹間看。  
看花何必三千歲，帶雨寧須十萬竿。  
却怪靚粧情脈脈，不嫌青玉瘦纒纒。  
何郎粉面堪憐許，擬學風枝耐歲寒。

送徐彥思三首

好事何人說醉翁，賢良名在著書中。  
只今文采猶如此，當日淵源豈易窮。  
遺恨可堪驚別雨，新詩不復咏流風。  
慙公千里相求意，楓落吳江恐未工。

凜凜忠言公自持偽書初赦兩淮時膝當不為奸雄屈  
心亦唯應草木知獨任安危百年事寧辜父老一生思  
抗章終有論功日便到鑿坡已恨遲

枘方乖鑿固應殊草木相求世久無可怪風流如孺子  
不嫌人物似曹蜍兩溪風月空勞夢千里歌謠尚載塗  
他日鵝行一回首冷鳧乘雁只江湖

二月二十六日伯遠邀遊小園明日有詩次韻  
園荒不見二疎歸風引長藤欲上籬燕子作巢春寂寂

竹枝搖月影離離誰為五柳當年傳又誦三堂此日詩  
我欲一邱藏曲折此心唯有子相知

二月二十八日靜寄軒作

看得階前碧草濃小桃猶作亞枝紅五更夢斷鷄鳴雨  
三月寒生燕子風歸意擬尋黃篋舫春愁最惱白頭翁  
鶴長鳧短知多少盡付軒渠一笑中

駝山寒食二首

時節近禁火東風猶小寒絮飛爭渡水鞦韆欲平竿酒

忍愁前把春仍亂後看吾歸須少日花在莫吹殘  
過眼夕陽雨滿襟寒食風鳴禽說春事暖樹落嫣紅杯  
莫頻停手花令解笑儂人生不相見可忍更怱怱

張元明為道卿畫竹間梅

我作東窗竹外開斷魂香自雪邊來細尋水墨圖中意  
似對檀欒塢裏梅筆下懸知有冰玉胷中元自少風埃  
可憐能事王摩詰解令春從一笑回

太倉稊米集卷十八



欽定四庫全書

集部

太倉稊米集卷十九至  
二十二

詳校官庶吉士<sub>臣</sub>李如筠

主事<sub>臣</sub>呂雲棟覆勘

總校官編修<sub>臣</sub>倉聖脉

校對官中書<sub>臣</sub>高中

謄錄監生<sub>臣</sub>范鳴謙

欽定四庫全書

太倉稊米集卷十九

宋 周紫芝 撰

詩四十九首

題周掾西山亭

江靜雲恬眼界空，危亭高枕麗譙東。  
風來雨後憑闌處，山在人間拄笏中。  
春去平蕪隨處有，鳥啼斜日滿林紅。  
伯仁空洞渾無物，容我清樽一笑同。

次韻道卿聞新鶯

草長江南春欲闌，曉鶯聲在綠陰間。  
定應春恨知公子，故作清歌學小蠻。  
催盡落花風自暖，喚醒愁眼日長閒。  
隔枝時見黃金羽，始信庭柯會解顏。

次韻道卿縣樓觀雨之集

樓下江聲雜雨聲，斷雲初掩斷霞明。  
吹殘惡熱涼生面，瀉作奔流綠繞城。  
擾擾驚禽樓不定，娟娟缺月坐來生。  
遙知舉白酬豐歲，醉裏憑欄句又成。

道卿論吳中夏果詞頗夸，且借蘇內相春菜詩

韻作詩僕亦同賦聊為江南解嘲

江南五月菱垂葉葉底紫菱如紫蕨梨香濺齒蔗漿寒  
瓜熟堆盤水精滑紅薑抹縷雜吳鹽纖手淹梅帶微辣  
芳林露下摘金桃入眼臙脂紅臉抹木瓜甘酸天下無  
百果論功誰可甲朱櫻萬顆滴堦紅滿架蒲桃更肥茁  
橙香粟大芋如鴟此品秋來不勝說老翁空作解嘲詩  
但恐年衰左車脫

次韻羅仲共靈泉夏夜二首

靈泉無暑竹連山絕似秋霜五月寒我欲訪君安得往  
江湖滿地一漁竿

泉聲落枕喚詩成傑句中言萬壑聲起看四更山吐月  
又扶藜杖到天明

夜訪伯遠偶題長句

夜攜桃竹上山枝來叩徐侯種菊籬憐我風霜猶短褐  
喜君人物是長離酣歌強對老來酒忍淚重聽亂後詩  
一笑相逢真我輩此情慎勿遣兒知

駝山秋晚二首

詩翁老去無人數，晚歲移家在河許。  
敗絮蒙頭那復霜，破屋穿天只愁雨。  
大兒窻下抄奇書，小兒燈前誦論語。  
明日羞囊餘幾何，客至無錢具鷄黍。

溪邊茅屋知誰家，門前水落溪露沙。  
枯藤繞屋掛秋實，黑如點漆紅丹砂。  
蜀葵花空已收子，鷄冠樹高猶有花。  
客來倚杖主人出，屋頭日暖聽蜂衙。

聞張伯真割奉粟二十斛見遺而書未至戲題

小篇

老去空嗷守錢虜我亦無錢買田畝未容殘月喘吳牛  
空對杏花耕宿雨昨宵夜誦偶連明今日晨炊忽停午  
長腰聞有尺素書腹飽先懸待椎鼓浣花老人殊可憐  
忍飢更索飢腸語故人祿米肯長供司業酒錢時亦與  
平生無句可驚人未審何由坐斯苦幾時去作多田君  
滿田穰稔多黃雲長年飽飯作穀伯且免勞人勤指困

九月十六日生日示內

從我憐君二十年備嘗險阻與艱難  
試看剪髮師陶母肯為親春媿阿鸞  
香火結緣聊為老杯盤為壽小同歡  
鹿門願遂平生志更享全家百歲安

次韻道卿見貽

樓下秋空月似波與君高自在庭柯  
新愁別後知無數白髮年來畏轉多  
歲月催人駒過隙世緣相縛雉羅羅  
多才似子仍多學他日金鑿穩上坡

次韻道卿催梅



江上連朝暗飛雪花信風遲寒凜冽東閣觀梅殊未妍  
揚州何遜心應折何郎思苦花欲開羯鼓不倩天公催  
詩翁自是催花手能挽春從天際來帳下玉人羞起晚  
弄粉含姿半驕蹇應憐冶葉與倡條有意凌寒入芳苑  
君詩好更誰與論會令寒谷生春溫冰姿一笑忽滿眼  
誰道鶴林花有神

次韻道卿梅花長句

月娥窺水晚纖纖風味能回鐵石嚴滿地不禁飛處急

一枝猶得醉時拈國香無意欺蘭蕙天質應羞擬絮鹽  
冷藥依然在空谷何人重傍少陵簷

次韻邵文伯懷桐渚與陳子高唱酬之樂

謫仙騎鯨上天去萬古風流一丘土去天尺五城南杜  
晚上瞿塘望江渚兩翁憔悴人不與造物嗔渠作奇語  
陳侯筆勢誰可禦九鼎自可獨力舉夢中尺錦君盡取  
時向曾中作吞吐邵郎詩高孰賓主一笑相看兩相許  
清歌那忍聽金縷渠坐詩窮君勿怒衰翁老氣不可鼓

篆鼎瓦棺心好古此別相逢定何所他時剝啄叩君戶  
藜杖經行尚堪拄

次韻靜翁雪中見過三首

年年飛雪閉寒齋老怯風威不下堦客至未妨頻叩戶  
人生何必要籠街莫嫌縱飲方投轄聞道中興已勒崖  
自笑下愚移不得從渠撫掌笑高柴

故國飄零萬事乖十年不見雪中堦要令幽子安圭竇  
少待兇酋脫藁街援筆何由賦梁苑閉門只合老蒼崖

君來看我煨黃獨自採春山帶葉柴

端門萬馬想初回跪賀群臣拜玉階我約江鷗分雪浦  
誰將烏帽踏天街從遊久欲真浮海送客懸知亦自崖  
猶有升平臨老眼尚堪方嶽看燔柴

二十八日雪霽讀晁無咎集呈別乘徐彥志且  
以奉懷

蘇公論士昔未聞四客輩出俱同門龍媒忽下洗凡馬  
野鶴一舉空鷄群虞皇七友廊廟具元和十子非渠倫

張公屈宋排衙官清詞麗句冰雪寒秦公筆下有過秦  
平生目短曹劉垣金華仙伯學杜甫句法自許窺公藩  
晁公磊落天下士帝遣長庚下人世舊聞一醉百梨花  
醉後狂歌滿天地詩成只在倚馬間高談頗似懸河翻  
當時七發真少作秦漢以來無此文今日晴窻有佳色  
積雪為洗烟埃昏千山排壘削寒玉萬木擁戶明朝暎  
試攜塵編醒病眼隱几一笑空爐芬是中有味知者少  
此意便欲從公論

題南金慎獨齋

聖道不可窮探取隨己欲平生所受用政可一言足子  
思著中庸暗室戒慎獨危微恐懼心此念旋已熟學從  
西洛來標榜相品目袖手看屋梁表表如鶴鵠誰知曾  
中塵往往盈斗斛伋也而有知寧不貽彼忸吳侯蚤作  
吏未肯事邊幅得妙自聖處了不關世俗頗知幽隱中  
日月所照燭不敢欺秋毫高情潔冰玉願言從君遊着  
鞭蹈前躅

題彥恢家草堂

李宏字彥恢慕石徂徠為人家有守道堂呂居仁宣城四友之

數

昭陵厚德如乾坤廊廟補袞多公言徂徠官在百寮底  
有時論事驚天閣皂囊欲上諉已滿霜臺不到名空尊  
李侯自是千載士人說贊皇今有孫長安御史一驄馬  
人物眼高爭薦論南牀小忍便可得直氣肯受高官吞  
青雲垂上却回首得州如斗車朱轡兩公相望空落落  
當年風采今仍存古來名節與富貴輕重略等常平分

天公相愛似有意黃鵠欲舉方騰鶩未開青瑣霄漢上  
故著草堂烟雨聞人生窮達固難料時來鶴亦能高軒  
願公努力善自愛更進樂石裨華勛

次韻道卿殘臘步遊林藪草木漸有生意三首

抱病歲忽杪杜門誰復來感子陽春句為噓寒谷荻君  
才那易得辭華陋鄒枚草木不足羨雲衢路當開春意  
私節物榮枯竟何哉封侯與裂土且當付輿臺

老意慘不樂青春為誰來藝蘭在九畹誰能起殘荻桃



李忽滿眼其寔亦枚枚耕田種芝草玲瓏殊未開榮華  
競春事于我何有哉當浮白玉闕下睨黃金臺

人生有榮瘁否極泰必來君看九地春寸草無餘莠白  
首始一遇蒲輪迎老枚祁隱不可招詡徑行當開我欲  
尋盧敖盧敖安在哉但當急洗眼看子登雲臺

讀元微之詩有感

從古才高少識真此公句法老尤新世間言語渾無用  
天上吹噓却要人但遣前旒知媵媚莫嫌後榻有嘖呻

夢中富貴能多少空使清流作怒嗔

舟次句茨

時寓白湖

移居來近玉湖中漁戶新添白脚翁  
覓句深慙何水部浮家全似陸龜蒙  
山寒政恐無黃獨地濕應須要鞠窮  
晚日飄零天不管雙鳧乘鴈聽西東

雨寒連日大風病中作此詩

門外湖光潑灑中春寒那聽雨濛濛  
吹殘梅雪如山雪顛得江風似颼風  
雙燕擬來尋舊約小桃渾未試新紅

黃紬獨擁眠方熟剝啄何須來惱翁

暝立

山隔湖邊路人棲柳下扉船從几席過燕掠水波飛鳥  
亦昏纔定牛知晚自歸幽人常暝立日日到斜暉

次韻黃文若寄燈夕不出之作

少小從舞雩鼓瑟常屢希結髮事墳典願言探玄微鐘  
鳴漏忽盡殘星獨暉暉征鞍老塗路白露霑裳衣齒髮  
倏已暮富貴終難祈佳辰念京洛流車看駢駢結客少

年場兒女如瓠肥紅燈白晝暖醉盃黃金揮回頭二十  
載狗盜相因依時光了如夢菽粟不救飢飄零少行樂  
老大空歔歎今年四海靜處處張外扉芙蓉焰明釭金  
波麗春幃穠李樽前歌遊子月下稀錚錚銀漏中撲撲  
春蛾飛此老最可憐已杜禦寇機但知草中和浩蕩歌  
皇威晶熒一短檠搔首悟昨非風流如黃香不作傳柑  
歸更攜袖中珠來尋北山薇詩盟倘可同願復無余遺

題趙安定像

烏巾白角雲錦裘長脰翫麟高結喉王孫自是真龍種  
世上懸知無此儔醉裏哦詩詩欲就風月平欺兩肩瘦  
秋風為神玉為骨畫手何從寫竒秀仇池客多誰在亡  
高準虬髯唯汝陽紫皇苦欲奏瑛語此曲至今空斷腸  
腸斷公歌侍兒拍甕裏黃柑自春色老坡不見空淒然  
此詩此意無人傳

題包鼎大虎圖

人間妙伎古亦有畫虎從來易成狗何人為作老於菟

鼎死百年無此手想當運筆亦有神睥睨知誰看回肘  
便恐陰崖風雨來何止草中狐兔走易生驚猿羞掛枝  
周昉穉犬空復肥畫中生意似可喜此虎一出無餘姿  
邇來喪亂書阮苦唯有君家此畫古妖狐一丘渠自安  
狡兔三窟無人取建章宮殿空咸陽猛士知誰守疆土  
藜藿不採虎在山安得有臣如此虎

忻師介軒

念我昔年少剛介頗成癖多錢啣守虜飽飯嘲穀伯有

口能雌黃反眼輒青白阿奴恃火攻未必出下策一笑  
當尊拳僅得貸雞肋只今真老大鬚髯已如戟折肱成  
良醫忤物知何益要令空洞中下視滄溟窄峽嶢固難  
全容容聊自適知雌在守雄外曲當內直此理吾已明  
師獨未之得願言戒覆車聊用銘子壁

三月五日晚霽大風

雨後風扉擁青嶂家在斜陽晚潮上沙頭飛盡雪色鷗  
柳下初橫短篷舫皇天惡料風忽顛賈客倉黃回五兩

老人倚杖不肯歸看打南湖白頭浪

九江王興道早歲休官作易安奚疑二室要余

作詩

心如止水不妨清身似無官不為名但把一椽供偃蹇  
從他百鬼瞰高明路迷鷄犬家何在身與漁樵席屨爭  
眼看青雲有矰繳鷓鴣巢小未宜輕

朽骨枯莖未必靈行藏何苦訪君平問津世路心先  
懶買地江干計已成解向急流求勇退便知幽事合關



情裕陵將種今誰在但恐君王問姓名

倚杖

雨脚收寒久東風倚杖頻浪翻雙鷺起船過小鵝嗔客  
飯長腰米林居折角中澆山一掬淚回首故鄉春

寒食日歸郡舟中作二首

歸櫂浮江水寒衾擁醉眠亂花飛送客細浪穩隨船淚  
落澆山酒愁生禁火天一從胡騎入飄泊到今年

世事聊相挽吾歸亦有期白湖為客久寒食到家遲接

屋花仍在遮門柳自垂  
向來歌社裏應著老人嬉

春事

春事無多日江村有數家  
等閒飛燕子容易落梨花草  
色過薄雨柳陰暝淡霞  
詩成不歸去暝立看棲鴉

湖居春晚雜賦八絕

雪屋臨湖憶繫船  
柳汀吹絮又經年  
白鷗大似知人意  
分與滄波十里天

雨後春湖拍拍流  
近門誰繫兩三舟  
水邊寒食飛雙燕

柳外斜陽卧一牛

數日東風緊閉門  
小桃知有一枝新  
花飛不復到老眼  
可是春寒欺得人

倚牀相伴一枝藤  
強作春遊老不能  
花底嬋娟詩嫵媚  
枕中日月睡瞢騰

黃蜂歸後燕成家  
楊柳初飛一兩花  
已是無春可拚得  
亂紅何苦惱霜華

曉鏡烟凝水繞湖  
晚汀飛鷺又成圖  
早知魚鳥堪同樂

愁得華顛政不須

兩日東風着意顛南湖風浪不行船飛沙走石成何事  
吹得楊花也上天

湖水波連野水邊欲晴鳩喚未晴天懶吹雲去風無力  
打得花殘雨可憐

雨中立杏花下

淺紅疎藥出牆頭事往人空鎖北樓烏為春愁渾不語  
花知人意亦含羞東風脈脈情何限細雨濛濛淚不休

却憶去年花下醉依稀記得小蠻謳

恭聞已迎原廟聖容入行在所

兵氣滿京洛橋山萬木悲園陵回望遠袞繡自天垂日  
月瞻遺像衣冠拜赤墀櫻桃薦原廟重見漢官儀

太倉梯米集卷十九

欽定四庫全書

太倉稊米集卷二十

宋 周紫芝 撰

詩六十首

雨後二首

造物有佳思，故晴娛薄遊。  
湖光散鳧鴈，野日下羊牛。  
水欲滿舊壑，草還青遠疇。  
雲來猶倚杖，雨過忽橫舟。

晚日纖纖出，痴雲陣陣回。  
風林無定翼，晴漢有殘雷。  
白水自天去，青山隨眼來。  
峰高月未吐，更擬著詩催。

將歸白湖而雨

世間那得此間身，恐是前生賀季真。  
白水窻閒頻入夢，黃梅雨細却留人。  
重聽欸乃烟中曲，淨掃離騷几上塵。  
但得南風送歸棹，未應幽獨解傷神。

中元日雨中錄所見

顛風急來萬木萎，迅雷不聽人掩耳。  
南山栖鳥失故巢，北山翔龍卷湖水。  
翔龍掉尾不肯收，眼看滄波接雲起。  
想當舟楫避驚濤，無數魚蝦趁龍尾。

讀張載揚所示近詩頗懷其人

眼中人物欠曹劉老矣逢君接勝遊詩與漫郎推行輩  
元具字從坡老得源流羸驂又踏千山去黃菊空催九  
茨也

日愁橫槩想多秋後句詩成須著錦囊收

次韻仲照秋懷四絕

日斜樓閣暮雲中黃菊紅蕖滿院風酒熟未酬花爛熳  
詩來時聽玉丁東

老去篇章誰與酬秋來又喜與君遊遺音固自成三歎



妙語不應慙四愁

白髮新愁滿眼中  
騷人零落怨秋風  
年來詩思成何事  
聊伴寒螿泣露叢

秋在幽人行樂中  
好山欲盡更須窮  
花姑水繞幾時到  
罨畫溪遙路欲通

秋雨連日

老鬢風吹急愁雲帶雨飛  
白添平岸水紅掩傍幽扉  
力盡方謀食天寒未授衣  
此身慙社燕秋晚亦能歸

次韻羅仲共教授閒居三首

為米要令陶令出無氈今坐廣文窮懸知嚼蠟世味薄  
未抵撲衣山色濃大蓋且從渠自擁小槽當與客頻中  
家談安得從三老華萼同編是古風

了事痴兒不到詩間中鼓吹自應竒莫教句法驚人甚  
便恐功名入手遲性癖雅宜嵇叔懶官閒只有漫郎知  
庭梧想得西風急秋意微生楚些悲

擬築揚雄宅一區碧鷄坊外且成居湖江君尚作浮宅

風雨我當無。敞廬平日夢遊。嗟路遠新涼。見面恰秋餘。  
便須載酒相從去。要識平生未見書。

白湖聞鴈三首

斗落參橫天雨霜。夢殘燈盡客思鄉。丁寧莫作叫雲去。  
老眼不禁秋夜長。

晚向瀕湖寄一椽。只憑沙鴈與周旋。北來南去莫惆悵。  
我亦飄零那記年。

華人流落幾秋風。南望中原信不通。好寄書來蘇屬國。

君王方射上林中

九月風雨終日用懷載揚韻

九日清尊強挽秋滿庭風雨復誰遊俗人言下無三語  
此老胸中有九流白髮不妨欺短帽黃花應解笑痴愁  
客情老去何曾好雙鯉書來幾日收

九日不出

白髮誰憐我黃花最憶渠酒盃今日把筋力去年殊身  
遠秋如夢謀疎老更愚客愁澆不下強欲醉茱萸

橋成

尚憶防秋日疎渠轉曲城萬方知盜息此地看橋成拄  
杖知頻過遊魚莫漫驚明朝趁虛去畫柱曉霜明

雪夜

病眼怕遙夜宿爐依小温酒醜嫌雪厚書細苦燈昏殘  
臘歸時夢他鄉盡處村可憐雙白鬢深閉一蓬門

讀蔡中郎傳

人生無先知頗欲邀後福自言苟依違安得有顛覆伯

嗜英偉資高義甚敦篤不為左回天輒作流水曲立朝  
有公言誰能保家族朝奏皂囊封暮就洛陽獄晚節不  
自守一跌變前躅起依千里草九徙如轉軸卓死固已  
久安得復嘖感琴中知殺氣此理反未燭陋哉王司徒  
避謗私欲戮公忠信安在志操等流俗何能起顏綱此  
輩真碌碌

責鷄

豢犬欲司夜畜鷄要鳴晨二物一失職遂辜畜養恩嗟

我籠中鷄芥羽光照人我冠事飲啄絨口隨晨昏我怒  
欲爾烹鷄笑復自陳君看多言者以忠獲怒嗔臺評與  
幕辨嗷嗷常殺身幸此北窻臥頗似羲皇民五起笑朝  
士三號驚夢魂使子卧紅日謝客扃柴門此意殊不惡  
誚我無諄諄

客舍二首

日日湖邊路頻來我不嗔故山無百里客舍遂三春紅  
落含桃過青垂小杏新光陰花委地飄泊燕依人

疇昔江湖意兒曹摠不知幅巾霑雨過拄杖看雲移鳳  
子飛應遠鶯兒語最遲閒從梅雪後直到麥秋時

送張顛東歸

張顛佳處是清高不但詩狂酒亦豪自說平生耽翰墨  
未嘗名諱落官曹書工恥作雲間榜畫好能添頰上毛  
早信人間苦荆棘不嫌門外長蓬蒿

薄暮一首

物外無餘子愁邊有是翁夢回驚日脚雨罷看雲峰天



與長閒處湖供不斷風猶嫌太多事身落亂書叢  
睡熟不知雨夢殘無限涼鶯飛時到眼鷺起不成行  
熟分蒼玉蓮香擘翠房掃門還待月近水更移床

靜夜二首

家與重湖近門當永夜開鷺隨波浩蕩人共月徘徊  
曉色催星落飛雲帶雨來長鬚汲水去小艇得魚回  
湖影入散髮晚沙橫斷汀冠歌從自落門設未嘗烏鬼  
着林邊火螢翻水上星時聞有船過月黑夜冥冥

雨晴望青山太白墓在其下

世間尤物如異人青山不入諸山群  
晚來濃翠欲成滴  
雨後數鬟高切雲人言茲山下埋玉  
太白祠扉落岩谷  
至今樵牧無斧斤餘潤油然歸草木  
往歲小生來酹公  
秋山未霜葉尚綠是時落日在屋梁  
彷彿如照公眉目  
今我不樂湖水濱青山到眼無朝昏  
更欲再拜望拱木  
公已乘鸞上天門帝鄉渺渺不知處  
誰能為我招清魂  
死生夜旦何足道不敢復作湘纍文

僕去歲作湖居十二詩向開叔有詩次韻迺為

謝

三年湖雨一茅茨坐遣幽人識面遲  
遺恨忽從愁裏盡交情先向句中知  
重尋故里空勞夢亟買歸舟會有期  
何日劇談聽疊疊滿傾春酒細論詩

得木犀

三年身在菰蒲裏手把岩花意惘然  
折得秋芳香滿袖夢魂常繞故山前

夜苦秋蚊達旦不寐

昔年記淮邦茅廬蔚秋草兩耳無晨昏秋蚊困飛繞利  
吻極慘傷群飛固輕矯懸知孀女祠未可較多少至今  
夢中雷客枕疑已曉那知三家村復此終夕撓青烟鬱  
蒿艾橫空益奔擾手倦勞撲緣眼病惡薰燎誰言天宇  
大微物吝除剽何必養嘉羞便可付丹鳥

歸自白湖舟中作

客舍三寒暑扁舟入往還殘年不如意老色日凋顏暗

谷鳴珊瑚晴巒結翠鬢江禽渾識面似欲喚人閒

寄家龍谿寺小閣初成

時寓橫岡

三年波浸白湖門佛屋新分水北村窻可近書真窈窕  
室纔容榻頗深溫妻孥共社同香火魚鼓催人作曉昏  
雪頷已疎憐我老雲蹤無定與誰論

次韻雷飛卿送其女兒南歸

蘭皋飛佩一淒然別酒深傾玉滿船誰喚孤帆落天際  
盡驅秋色到愁邊燎鬚心在人能說擬絮才高墨未乾

莫向南湖頻著眼，斷鴻疎影在雲烟。

次韻陳李陵閱猥藁見寄

相思一日九迴腸，多謝來書細作行。  
鏡裏有霜憐我老，鼎中無鬻付君嘗。  
衰顏本自羞連壁，佳句仍驚得夜光。  
五鳳樓高無此手，曹劉真是及肩牆。

次韻文殊老人題寶頂寺

門連弱水不可渡，山似妙高知幾尋。  
得雨僧分香積飯，行檀人施裊蹄金。  
重新佛屋龍天喜，已退魔軍歲月深。

老去願隨君共隱誰能擁膝更長吟

楊次公侍講得古印于洪井其文云東海開國

次翁之子德潤以贈徐伯遠伯遠有詩次韻

王謝風流本自長天教洪井發珍藏定知東海新金斗

可繼文安舊印章

內相徐公伯遠祖封文安郡故有文安開國印也

龜去豈無

江上戀鵲來今得石中黃傳家已作他年兆莫把功名

付錦囊

次韻雷飛卿遊山時余以病不往

一病能令百念闌  
霜蓬零亂照衰顏  
心知只可開三徑  
炙手何勞叩八關  
老喜社中多臭味  
夢思方外有躋攀  
勸君莫放尋山屐  
贏得浮生半日閒

渡陂南用斜川韻

萬物自有得吾生  
感行休及茲天氣  
佳步尋水南遊青  
板得野航竟渡一  
葦流乘流本無心  
豈有不下鷗開口  
月有幾百年終一  
邱與世似異趨  
此行誰我倚村醪  
亦足醉對影自獻  
酬未知垂老日能  
遂此樂不事定會  
當



諧不復懷預憂但願營自安孰是都無求

歸陂北用斜川韻

薄遊不盡興歸卧當少休曲水雖陳迹斜川有新遊  
浩歌獨長往豈亦慙此流僑寓三家村飄如浮水鷗屢爭  
漁樵席共守狐鼠邱削跡屏冠服索居謝朋儔樽中有  
餘滴子獻復父酬殷勤問穉子女復樂此不穉子掉頭  
笑老夫豁深憂但令常復爾過是吾何求

舟中次韻飛卿贈別長句

早歲從田歎不逢老隨乘鴈聽西東青山約在何時了  
白髮歡成一笑空昨夜清歌催別酒只今寒月上孤蓬  
相逢莫怪長相憶舉世交遊無此風

雪後望文脊諸峯哦韋蘇州門對寒流雪滿山

之句得兩詩

復居城中

雪壓寒林春未回晚山猶帶玉崔嵬誰將舊日韋郎句  
貌取郭熙平遠來

新來嫋嫋娉娉雪猶在重重疊疊山莫作故時峯嶺看

玉京今不是人間

送方元相宰錢塘

雲路飛騰合到君，不應猶現宰官身。  
未分東觀消長日，聊為西湖作主人。  
天近得聲知亦易，民飢當念可須嗔。  
簿書叢裏江山在，了事何妨得句頻。

向開叔借陳公詩卷以詩奉寄且易乙藁

誰言靜寄是窮兒，盡得陳公晚歲詩。  
一讀便醒雙淚眼，頭風更擬倩誰醫。

平生不識陳驚坐傳得新詩喜失牀聞道明珠猶滿眼  
煩君為我一傾囊

舟過道場山下將往遊舟師告以雪塗不可行

而止

風蒲飽朝航霽色急新漲雲山繞平湖水墨澹屏障夷  
猶拖初回突兀山入望何妨傾寸眸便足了千嶂想像  
鐘磬音隱約霄漢上我欲一往遊遐瞻茲可暢暮雪猶  
在塗遺事不得訪人生蠟屐緣一世能幾兩登山追勝

遊脚力須少壯重來定何時吾策今可杖老願復爾違  
撫事一惆悵

老日

老日那容惜晴光到眼休蠶知今日浴麥復幾時收黃  
犢分青草花鳧趁綠溝誰能更歸得已是一春留

西湖山下梅花塢行可里許至陳御史園亭

倦客厭卑栖白日坐飄忽呼我同舍郎緩策扶勃窣緣  
山得人家附影蔽深樾湖水一鏡明梅花千樹發扶疎

弄清影彷彿見羅襪淒迷香霧中身已在月窟窮探意  
未已取徑無詰屈誰家歌舞園花亂竹復密御史投絃  
餘課豎種梨栗吾曹不解事尚此學操瑟當從漢陰人  
抱甕日搨搨

寒食前五日作二絕

杜鵑新聽曉來聲暖氣催花一夜成寒食只今無幾日  
故鄉何處不關情

寒食風埃滿客中西湖烟雨送愁頻日高未起鳥呼夢

春晚不歸花笑人

三月二十二日春雨終日

此情誰與問天公  
幽事全歸白髮翁  
袖手尋詩紅燭裏  
卷簾聽雨綠陰中  
杯盤眼見櫻桃熟  
時節心驚柳絮空  
誰為羈栖到三月  
還家猶及舞雩風

奉酬德莊見和

趙彥端字德莊有詩文  
行于世號介菴居士集

橫飛袞袞見諸公  
着眼何由到此翁  
胡粵相忘千里外  
金蘭投分一言中  
詩緣漸熟情難洗  
老色來煎念已空

銷盡客愁知底事  
愛君回雪與流風





太倉稊米集卷二十

欽定四庫全書

太倉稊米集卷二十一

宋 周紫芝 撰

詩六十二首

酌六一泉頗懷昔遊

孤山屹中流長隄轉湖尾泯然懷昔遊踴躍尚壯齒道人引清甘一掬託分似重來固依然歲月今有幾華堂失雄觀缺甃久未理誰令走鼃黽投筆便如鬼龍宮空一炬狗盜忽四起佳處不負人環山自湖水並遊適相

契况我二三子少留當何之再來吾老矣

黃文若攜秦別駕侍兒像見過戲題二絕

能事空傳王右丞句如徐庾轉難名明眸正似溪光樣  
自古無人畫得成

謝家林下小梅花不着紅藍染絳紗莫笑畫師無國手

玉肌元不受鉛華

秦別駕  
名亘

羅叔共五色線中得玄真子漁父詞擬其體僕

亦擬作六首

叔共  
名竦

好箇神仙張志和平生只是一漁蓑和月醉棹船歌樂  
在江湖可奈何

禁中圖畫訪玄真晚得歌詞獻紫宸天一笑物皆春依  
舊扁舟釣白蘋

解印歸來暫結廬有時同釣水西魚閒着屐醉騎驢分  
明人在輞川圖

趁梅尋得水邊枝獨棹漁舟却過谿人似玉醉如泥閒  
歌五色線中詩

人間何物是窮通  
終向烟波作釣翁  
江不動月橫空  
漫郎船過小回中

花姑溪上鷺鷥灘  
辜負漁竿二十年  
無可載不拋官  
攜取全家去不難

次韻黃文若春日山行過秦德久六首

百金聊作杖頭沽  
旋剪春苗薦野蔬  
便可且傾陶令酒  
未須真憶季鷹魚

眼前風物一番新  
江上桃花惱殺人  
可笑草玄窻下客

滿庭吹絮不知春

階前春草喚愁生  
屋上鳴鳩報晚晴  
忽有好詩來照眼  
似逃空谷聽人聲

不作林間曳履行  
老來春日總無情  
還驚柳上風催燕  
又見花邊雨弄晴

櫻桃花下小窻扉  
聞說嬋娟是柳枝  
茗椀已煩羅袖捧  
篆香仍借好風吹

鳥啼花發未春闌  
日飲無何意自閒  
更喚小蠻娛醉客

主人風味似香山

追和向蘇州罷吳門作

幕北傳烽飛夕埃廟堂今日要真才肯將身向急流退  
要問客從何處來寶墨光翻銀漢落畫船恩重錦帆開  
習中邱壑公元有便恐鷓鴣夷挽不回

追和向蘇州頃在吳門嘗用韋應物作凝香閣  
舊有白公檜今不復存為補植之

韋白兩公名欲埃薜林一出未難才樹從居士池邊種

香入蘇州句裏來陶令北窻應好在何郎東閣為誰開  
二疏歸後今重見遙想都門張飲迴

追和向蘇州舟次京口聞名諸公簡朝中知舊  
聖主思清戰騎埃盡將尺一起群才匈奴莫向雲中入  
尚父今從海上來繡袷不當羶毳用玉關寧為犬羊開  
公冠已掛知何事猶有忠腸日九迴

古風二首別李守若虛

東南富佳郡此地復名城拜策奉溫詔謁帝辭明庭悠



悠出金闕旆旆搖熊旌蘭風藹微和玉露滑以零征輦  
肅郊壘嘯詠閎齋鈴微生等薜蘿託根符餘榮誤遭一  
笑盼永懷千古情千古不足多喜遇罕所并白璧勿漫  
予按劍徒取憎

逸足思長途勁翮慕遠漢壯志忽蹉跎功名失華旦孤  
芳不自惜靡靡同草蔓飢寒日劬勞霜雪念哀晏眇焉  
尚遐征逸車指芳甸故國念離憂高軒增老戀會當酬  
知心努力加餐飯微勇或可賈未和南山檠

叔共出近詩百餘篇攜歸燈下讀竟題小詩其

後三首

避地兩家三五口只今那忍記當時誰知臨老相逢日  
猶得重看亂後詩

翠鬟當戶山如染匹練繞簷江自寒縱有鷺溪誰寫得  
要從無色畫中看

東平不復歎塗窮有姪賢如阮仲容淨觀菴中詩作社  
水西山下酒分鍾

讀巴東集二首

熟睡能令敵退師高談脚決廟堂疑  
風塵洗盡渾無事却卷波瀾入小詩

談笑成盧事亦難一言能借百年安  
群姦未死公休恨但遣枯枝作歲寒

次韻韓伯嘉擬陸龜蒙坐眠行倚食學書吟八  
題

口角瀾翻二十年書多却厭腹便便  
年來拘折枯藤杖

參得跏趺面壁禪

黑甜有味要須嘗一枕誰同夜雨床  
世路風波難著脚  
老來當以夢為鄉

以下  
原闕

欽定四庫全書

卷二十一

--	--	--	--	--	--	--	--	--

11

昭陵一杯酒蚤歲功名塞天破九廟邱墟只回首狐狸  
未幾狐掘之天上浮雲倏蒼狗更憑頑石作靈祠頗似  
當年柳州柳不如梁公摩虎鬚為言百歲不祔姑提師  
十萬復誰可興邦一言還要渠人間萬事本難料老將  
未須輕腐儒

河橋晚思三首

出門猶未夕陽低倚杖還驚露濕衣  
等得樹頭鴉定後  
會邀林外月同歸

雨後津橋飲斷虹暮林重噪一蟬  
風月來烟隴掛玉玦  
雲向碧天成峭峰

秋水平堤帶雨渾小橋分港到籬根  
晚來幽事亦可喜  
忽有漁舟時傍門

次韻德莊送別

千里辭家復卧疴賴君一笑肯相過  
夢看赤鯉春騰浪



金一八八  
卷二十一  
歸見牽牛秋渡河空裏  
嬾能書怪事酒中自可作無何  
一竿忍負平生意重釣花姑溪上波

烏帽前頭沒馬塵箇中元自不無人  
風流公是習主簿  
文字我慙陰子春此日定交真有意  
一生弔影復誰親  
相從又失秋來約已結茅椽着病身

題黃縣丞墨牛

一牛飽卧春草綠一牛下坡引黃犢  
長安可笑人海中  
眼前見此三般棘詩翁老去飢滿腹  
歸把春犁豈非欲

人生所願能幾何百畝良田一牛足

鹿苑假寐

掛席月未落輟棹日將午亟尋墟里烟盡閱菱芡浦烈  
日方在舟騰雲未成雨瀕河得風岩佛飯過齋鼓龕燈  
明廣殿妙炷繞殘縷窈窕幾僧窻欸欠無一語我來几  
晝夢得句瘖不吐歌巾倒烏紗墮扇橫白羽涼襟亦已  
披歸杖當復拄為君趣扁舟夜雨軋鳴櫓

次韻崔都巡馬上望天目山

雨後青雲萬里開，翠螺新染玉縈迴。  
將軍馬健隨風去，天目山高入眼來。  
稚子能文非好武，君王賦韻不為才。  
且將橫槩新傳句，獨對西風侑酒盃。

茗雪舟中戲題

時赴官行在官舍在西湖上

永日扁舟破浪遲，青蘋不動柳垂垂。  
滿川安得飛來雨，看濕紅裙雪藕絲。

再賦二首

故國辭家遠，茗溪轉柂深。  
交游十里隔，歲月二毛侵。  
滿

意悲煙樹移時看水禽唯應陸魯望相見可知心  
雲暗千家雨寒生兩岸秋水翻波入戶人靚玉明樓山  
色遞愁眼荷香滿客舟水晶宮裏夢還作此生游

船曉

暝鳥驚飛急孤舟犯曉行  
拖牙侵月白帆腹受風輕  
雲破千峰出秋隨一雨生  
倚檣誰共語蓬首看參橫

舟中晚色二絕

望處天仍濶雲邊雨未成  
秋風莫吹散留作打篷聲

二

風急雨初過天高日未曛翠鬟堆晚岫水墨畫秋雲

臨安道中晚晴書所見

客路鄉關遠雲山暮色添秋高尚寒薄雨過却風恬附隴田成陸傾崖水作簾此行殊不惡未愧賈胡淹

二

何日王摩詰瀟湘畫短屏扁舟橫遠壑晚翼在青冥木杪收殘照雲間得數星吳姬不驚客拜月下中庭

西湖寒食

落花殘絮憶西園  
寒食歸心似紙鳶  
無復御廊分冷食  
又看茅屋禁清烟

十日不至湖上

我始跨匹馬  
蹭蹬來東吳  
東吳亦何有  
政復為西湖  
西湖如靜女  
婉然真彼姝  
湘娥結烟鬢  
水鏡涵空虛  
晴光固不惡  
雨態亦自殊  
窈窕一僧窻  
煙雲媚朝晡  
上下數白鳥  
飛翻與人娛  
只今雨鳴葉  
便作破跳珠  
寒窻掛薜

蘿身疑在菰蒲尺不得往况乃千里餘始來梅欲花  
旋復春去徂幸茲得少留駐我西征車尚可具小舟紅  
粧醉芙蓉

蘇公隄

翰林一去幾經秋猶有平隄繞碧流誰向西州還度曲  
此翁零落已山邱

次韻關子東筇杖

關柱字子東關演之兄  
杭人有詩文行於世

林下相從政要君春來花草各欣欣須煩無語木上座

時伴能言鄭廣文  
徒步飽看山入眼  
醉歸應有句凌雲  
誰知九節仙人杖  
解與先生立茂勳

悶題

壬戌歲始得官  
時年六十一

命薄官如虱年多鬢似銀酒醺雖有聖錢少本無神  
含笑欺老妨眠鳥鬧人青山渾可戀白眼莫相嗔

湖隄步游客言此蘇小墓也

野水橫分青草陂誰埋玉樹與瓊枝湖邊山自向人綠  
門外柳今何處垂行雨行雲釣是夢施朱施粉未相宜



一從蕙死蘭枯後剛道桃花好面皮

題淨空泉二首

泉在北山  
靈峯寺

誰穿巨石貯清泉不見超公舊講筵  
龍伴白雲歸寶藏  
魚隨流水下春田

欲尋遺事苦無碑老宿猶傳古律師  
尚恐蜿蜒在空谷  
水清不敢唾方池

送別

扁舟憶東來梅冷殊未芳  
故人念客寒滿意傾酒漿  
坐

中東床君笑語芝蘭香相從忽三月共飲湖水光花事  
乃如此碧草日夜長子歸我當留語離意難忘似聞小  
山居一葦僅可航會尋雪川盟着屐登上方

晚雨薄寒枕上作

睡過花時常掩關老人歡意自應闌愁邊可奈雨如許  
客裏不禁天尚寒數月鄉音無鴈到一年春事已梅酸  
夢餘猶憶江頭路擬喚歸舟下急湍

奉酌德莊見和一首

老於春事豈相關只有翻書意未闌白眼何由常玩世  
黑裘元自不避寒飽聽風雨眠方熟細說窮愁語更酸  
日誦離騷三百字便知新句有驚湍

太倉稊米集卷二十一